



Minggu, 08 Mei 2022

Ogen: 2 Tesalonika 3:12



Erdahin Encariken Keperlun



Keperluan geluh, enda me si la banci la icariken manusia. Dibata enggo nikapken dioni guna ingan tading, ingan nggeluh man manusia. Dibata nikapken lau, taneh, udara guna sebagian keperluan alu la nggalar. Tapi guna pangan, inemen, uis siman paken, bagepe biaya-biaya sidebanna termasuk pendidikan arus idahiken manusia gelah tercukupina keperluan sibage rupana. Pedah guna erdahin enggo me isehken Dibata man Adam ras Hawa, ija ikataken Dibata alu curcur panas arus erdahin seh manusia mulih ku asalna (Kej. 3:17-19). Emaka labo lit dalanna manusia la erdahin, nggeluh jadi kalak perkisat, la kai pe idahiken, ncampuri sikerajangen kalak ngenca pirasatna (oge 2 Tes.3:11). Enda me si jadi itengah-tengah perpulungen Tesalonika paksa e. Erkiteken sie ipersingeti Paulus perpulungen e arah ayat sijadi renungenta. Pedah enda isehkenna ibas gelar Tuhan Jesus si jadi guru kegeluhen man kerina kalak sitek. Perlungen arus nggeluhken kegeluhen si metanggung. Nilahi perbahanen sibanci erbahan perubaten, erbahan tondel ukur kalak. Arus kepe ia erdahin guna ncariken keperluan geluhna. Amin ipebagesi arus pengangkanta, arah erdahin me geluhta ipasu-pasu Dibata. La banci kepe siagahken gegeh ras kebeluhenta ibas erdahin enda maka siakap kerina e erkiteken beluhta. Ije arus iidah mata kinitekenta, iakuken pusuhta, Dibata ulu sinasa me masu-masu kerina pendahin ras pencahanta. Sabab ipasu-pasuna kalak siikelengina paksa tunduh pe, ertina kerina paksa-paksa arus sipake alu mehuli. Erdahin, sekolah, ngkelengi ras nampati kalak sideban dengen ersembah man Dibata. Bageme kita ncukupi keperluan anak-anak sekolahta ibas atena nerusken persekolahenna. Tutusi ibas dahinta ola sempat ketunduken.